


Иван ТОРОПОВ

Тэрыб Кок



Иван ТОРОПОВ

Тэрыб Кок



АРТ
МА

АУ РК «Редакция журнала «Арт»

Сыктывкар

2011

ББК 84(2Рос=Коми)

Т 61

Серпасалис А. В. Мошев

Торопов И. Г.

Т 61 Тэрыб Кок. – Сыктывкар: АУ РК «Редакция журнала «Арт», 2011. – 16 стр.

2011 во Коми Республикаса Правительство шуис Кагалон воон.

Тайö книгасö йозöдома «Арт» журналлön «Гижысьяс – челядьлы» проект серти.

2011 год Правительством Республики Коми объявлен Годом ребёнка.

Книга издаётся в рамках проекта журнала «Арт» «Писатели – детям».


ББК 84(2Рос=Коми)

ISBN 978-5-7934-0383-2

© Торопов И. Г., 2011

© Мошев А. В., рисунки, 2011

© АУ РК «Редакция журнала «Арт», 2011



Тэрыб Кок асывбыд нин ризъяліс-котраліс югыд шондіөн серөдөм, войся зэрөн сөстөммөдөм вөрын. Сійө то кыккокйыв лыйыштліс-кайліс джуджыд керөсьясө, то ньөв моз шутөвтліс-төвзыліс яла нитшка гулыд ягъясөд. А сэсса, мудзыштөм бөрын, дзум пыравліс посныдик вөра расъясө, чөсмасьліс небыдик пожөм йывъясөн да том пипуяслөн томиник корйөн. Пөсялөм мыш вылас сэки зэр моз гылаліс лысва, и сэтшөм любө вөлі кывны тайө ыркыдсө.

Сылөн топыд вир-яйыс туөма том вынөн, кызди тувсов кыз – зараваөн. И окота вөлі помтөг лэбавны чөскыд сынөдөн тырөм ягъясөд да нюръясөд.

Кор яр шонді кыпөдчис вылөкодь нин, да пондісны дөзмөдчыны көин кодь горш лөдзьяс, Тэрыб Кок лэбыштіс-петіс ю дорө. Бөрья кадө сійө унаысь воывліс тайө джуджыд кыркөтшас. Тані юладорсянь пөльтысь төвру разөдіс-


вөтліс быдсяма өвадсө, меліа ыркөдіс сылысь пөсялөм вир-яйсө. А нөшта сылы зэв любө вөлі видзөдны шонді югөръясөн ворсөдчысь ваө, көні тшөтш тыдаліс сійө ачыс.

Кутшөм винөлөн да мичаён лои нин сійө! Тшапа чатөртчөма гөрба ныра юрыс. А морөсыс мый пасьта! И кызкө зэв лөсьыда вочасөн вөсняммө том пожөм кодь гөгрөс гыркө. Кокъясыс кузьөсь, ёнөсь, на вылын сулалігөн сійө быттьө оз и кыв аслас тушаыслысь сьөктасө.

Сөмын тай юрсө оз на мичмөдны сюръяс! Но нинөм, регыд и сюръяс лооны. Öд сылы арөсысь нин унджык. А Ыджыд Сюра Бать висьтавліс, мый йөралы сюр заводитө петны, кор сылы лоө арөсөн-джынійөн. Гашкө, и батыслөн моз жө лооны вужля кодь паськыдөсь да уна вожаөсь. Сэки Тэрыб Кок нөшта на вына лоө, сэки сійө став вөр пасьталаас некодысь оз кут повны – некутшөм Кузь Гөнаысь. Öні нин ёнасө оз пов-а, көть эськө став оружиеыс сылөн – чорыд кок гыжйыс сөмын и эм...

Ыджыд Сюра Бать йывсьыс думыштіс да, пыр и нормыштіс сьөлөмыс. Кызкө зэв гөгөрвотөма янсалисны сэки найө. Быттьө кутшөмкө төдтөм вын нөбөдіс-нуис кытчөкө батысө. Дзикөдз вылө...

Сэки вөлі на төв, лымйыс эз на вөв уна усьөма. Пукаліс шондіа лун, и вөрыс гөгөр дзирдаліс лыдтөм-тшөттөм би киньясөн. Найө куимөн вердчисны Ыджыд Вөр дорса кушинын, узянінсянбыс неылын. Сійө буретш вөлі чегө вомас



кӧдзыдысла чорзӧм понӧль йыв, кыдзи Ыджыд
Вӧр пӧлӧнын югнитіс чардби да лӧкысь йирк-
нитіс гым. Ёна повзӧмысла сійӧ кыккоқйыв
чепӧсйис бокыв, мамыс бӧрся. А юрас вир-
дыштіс шензяна мӧвп: «Мыйла нӧ чардалӧ да
гымалӧ тӧлын?..» Дыр найӧ котӧртісны-пыш-
йисны Мелі Мамыскӧд Паськыд Кушин вомӧн.
А Ыджыд Сюра Батьыс кольччис. Тӧрыб Кок-
лы дивӧ вӧлі, мыйла батыс – сӧтшӧм пельк да
ён – некыдз оз вермы вӧтӧдны найӧс. Кор во-
дзын мунысь мамыс сувтіс, Тӧрыб Кок юалис та
йылысь. И гым йывсьыс юалис. Мелі Мам эз
пырысь-пыр вочавидз, сы вӧсна мый сылӧн дзу-
гылъмӧм синъясысь гӧгыльтчисны гырысь син-
ва войтъяс.

Медбӧрын мамыс висьталіс Тӧрыб Коклы,
мый тайӧ эз вӧв гым, а Кык Кокалӧн сӧласьӧм.
Мый тайӧ сӧласьӧмнас Кык Кока виис Ыджыд
Сюра Батьсӧ, да найӧ сӧсся некор нин оз ад-
дзывны сійӧс.

«Кыдзи виис? Кутшӧм Кык Кока? Ме некодӧс
эг аддзыв да?» – чуймӧмӧн юасис Тӧрыб Кок
шогӧ усьӧм Мелі Мамыслысь.

И мамыс дыр висьтавліс пиислы кык кока-
яс йылысь. Наысь пӧ медъёна колӧ повны вӧрад,
сы вӧсна мый найӧ медмудерӧсь да и, биӧн
сӧласьӧмнысла, медвынаӧсь. «Пельнад ёнджы-
ка кывзысьны колӧ, пиӧ, – велӧдіс мамыс. –
Миян, йӧраяслӧн, синмыд да нырисыд абуджык
мукод вӧрсалӧн моз сюсьӧсь. Сідзкӧ, медъёна
колӧ надейтчыны пельяс вылад».

Та бöрын Тэрыб Коклөн кутіс лöгыс петны Кык Кокаяс вылö. Сійö кутіс и повны наысь, кöть эськö ньöтчыд на эз аддзыв, кутшöмось найö.

А тулысладорыс, кор лымйыс лои морöсöдз да из кодь топыд, чарöмыс вирöдз дойдаліс кокъяс, на вылö уськöдчисны Кузь Гöнаяс. Дерт, эськö и öтка Кузь Гöнасыд найö оз повны, но Кузь Гöнаясыс вöліны унаöн, и быдöнлөн синъясыс сотчисны тшыг биöн.

«Но, пийö, кутам тышкасьны!» – кызд вермис збодержыка бакöстіс Мелі Мамыс да пырысь-пыр жö сетыштіс бөр кокнас медматысса вöтчысьлы. Биа из кодь гыжйөн шковгöмысь Кузь Гöналөн юр чашкаыс пасьмуні кольк кыш моз. Тэрыб Коклөн öзйис жö сьölöмыс, – öд сійö чужис повтöм рöдын! – мамсьыс на ярджыка сійö уськöдчис Кузь Гöнаяс вылö. Öтиöс таляліс воддза кокнас, мöдлысь сюрса лысö чегис бөр гыжнас. «Эк, сюръяс кö эськö вöліны!» – гажтöма думыштіс сійö кутшöмкö здукö.

Но Кузь Гöнаяс вöліны унаöн – öти усьöм местаö волісны кыкөн. Найö торйöдісны эня-пияöс öта-мöд дінсьыныс да кытшалісны торйөнтөрийөн. Тэрыб Коклы öти Кузь Гöна чеччыштіс нин голяас да лэчыд пиньяснас варснитіс-нетшыштіс яйсö. Мöд – кульыштіс зад кучиксö. Но Тэрыб Кок эз кöсйы сетчыны: сійö чужъясис, люкасис сюртöм юрнас, и сы гөгöрын туплясис нин Кузь Гöнаяслөн нель шой. Но Тэрыб Коклөн и аслас нин бырисны вынъясыс, туша пасьталасьыс визувтіс вир.

«Прөщайтлы, Тэрыб Кок...» – кылө, джөмдаланаа бакөстыштіс Мелі Мамыс, кодөс вөлі дзикөдз нин личкөмаөсь Кузь Гөнаяс. Тэрыб Коклөн ыджыд дойөн вөрзис сьөлөмыс. Медбөръя вынъяссө чукөртөмөн сійө уськөдчис Мелі Мамыслы отсөг вылө, но сәки куим-ө-нель Кузь Гөна личкисны сійөс асьсө.

«Буракө, пом...» – шогпырысь думыштіс Тэрыб Кок и лөсьөдчис кувны.

Но сәки друг гора вөр-васө косяліс-поткөдіс гымыштөм шы, и ньылөмөн да вирөн ойдөм синъяснас Тэрыб Кок казяліс, кызди пожөмъяс сайын сьавкнитіс-югнитіс.

«Кык Кока сьөласьө биөн!» – гөгөрвоис Тэрыб Кок, и дум вылас уси татшөм жө гымысь вошөм Ыджыд Сюра Батыс.

Гөгөр лои шы ни төв. Эз кут кывны весиг Кузь Гөнаяслөн эргөмыс. Тэрыб Кок восьтіс син пөвсө – Кузь Гөнаяслөн дукуыс эз вөв. Тэрыб Кок кыпөдыштіс юрсө, видзөдліс гөгөр. Кузь Гөнаяс некөн эз тыдавын. Неылын куйліс сөмын Мелі Мамыс, сійө эз нин вөр. И сәки сійө казяліс, кызди пожөм чукөр сайысь сылань локтө... Кык Кока.

Тэрыб Кок ёна повзьөмысла ымөстыштіс, кунис синъяссө. Юрыс сылөн бөр лёткысис-усис лым вылө. «Час, Кык Кока выльысь сьөлыштас биөн, и ме ог ло... Воддза сьөлыштөмнас тай бырөдіс Кузь Гөнаясөс...» – шога мөвпаліс коньөр Тэрыб Кок.



Сэссия сылысь, куньса синмалысь, быттё нюлыштисны голясё. Мамыс моз жё меліа. Ёна чуймём Тэрыб Кок восьтіс синъяссё – мамыс эз тыдав. Тайё, вёлөмкө, Кык Кока малалё сійөс. И дивё! – сылөн лапаыс вөлі мамыслөн кыв кодъ жё небыд да шоныд.

«Мыйла нё Кык Кокасыс сэтшөма полисны Ыджыд Сюра Бать и Мелі Мам? Со кутшөм небыд да шоныд сылөн лапаыс да?» – Тэрыб Кок вөлі дзикөдз чуймөма. Но, век жё, полөмыс сылөн бырыштіс.

А Кык Кока, мыйкө ас ногыс шуалігтыр, вель дыр малаліс курччалөм-парсалөм Тэрыб Кокөс. Сэссия и пондіс мавтны доймөминъяссё ку-тшөмкө ваён. Сэки Тэрыб Коклөн пемдыліс син водзыс лёк дойысь. «Со тай, вёлөм, кызди Кык Кокаыд көсйё помавны менё...» – бара мөвпыштіс шогпырысь. Но недыр мысти лои выль дивё: Тэрыб Коклөн ранаясыс вочасөн дугдісны висьны, лои зэв лөсьыд, и сійё виччысьтөг унмовсис.

Садьмис сійё, кор морөссё пондіс зэв ёна шонтыны. Орччөн сыкөд ыпъяліс Жар Би. Быттё гожөмын, кор повзёдчана гымалөм бөрын өзйылө вөр. «Тайё Кык Кокаыд тай быд дивөсё вермө вөчны!» – шензис Тэрыб Кок, а аслыс сэтшөм лөсьыд вөлі кывны бисянь локтысь шоныдсё.

Кык Кока сулаліс орччөн. Сылөн чужөмө вөлі сука быдмөма яла нитш, код пытшсянь меліа видзөдісны енэж кодъ лөз синъяс. Тэрыб Кок аттьөалана нюммуніс тайё синъясыслы.



Кык Кока мыйкө бара шуис гөгөрвотөма да матыстис Тэрыб Коклы ныр улас ичөтик ва гөпт. Тэрыб Кок мудзис нин шензьөмысь да весиг эз и думыштлы, кызди позьö васö матыстны динад, а не аслыд матыстчыны сы динö. Сийö öдийö тюпкис-суйис чушсö да пондис азыма чурскöдчыны.

Сэссия Кык Кока суйис сылы вомас мыйкө небыдös да чöскыдös, кодös сөйис и ачыс. Тайö сөянсьыс Тэрыб Кок быттьö кылис гожöмлысь, шондiлысь да ловзысь мулысь көрсö. Сийö вöли мам йöв кодь жö чöскыд и пырысь-пыр жö бөр содтис вынсö.

...Тадзи Тэрыб Кок төдмасис Кык Кокакöд. И вочасөн дугдис сыысь повны. И весиг ас кejas нимтис сийös Кык Кока Мамөн. Кузь Гөнаясөн начкөм Мелi Мамыс пыдди. Видзöд, коньöрлы дзор тошка пöльыд мам кодьөн кажитчис. Но да öд сийö эз төд йöзлысь оласногсö.

Аскинас Тэрыб Кок вöтчис нин выль мам бөрся, кодi шливöдис-исковтис чарөм вывти төвзысь кор моз, ньöти вöйласьтөг. Дырөн-регыдөн найö воисны Кык Кокаяслөн оланинö. И танi – вот и дивö! – ньöти повтөг жövьялисны Тэрыб Кок кодь жö йöраяс. Да мый сэн жövьялисны! Ыджыд Сюраясös танi вöли доддялöмаös, да найö кыскöны груз. А Йöра Мамьясös Кык Кокаяс лысьтисны.

Кор нин Тэрыб Кок төдмасис ас коддьöмьясыскöд, найö ошйысисны, мый налы зэв лöсьыда овсьö танi. Кык Кокаяс вердöны найös, дорйöны Кузь Гөнаясысь. А кужисны кө найö сёр-

нитны йӧз кывйӧн, то висьталісны эськӧ: тэ пӧ
веськалін йӧра видзан фермаӧ.

* * *

Бара воис гажа тулыс. Пондісны варовитны-
бузгыны Печораӧ тэрмасьысь шоръяс. Югыд
шонді азыма нюліс пармалысь лымсӧ. Тэрыб
Коклы, кодлы неважӧн тыри арӧс, лӧсьыда кутіс
овсьыны выль местаын. Кынӧм вӧлі пӧт. Дру-
гыд мыйта колӧ дінад. Кузь Гӧнаясысь повны
нинӧм. Тэрыб Кок ёнакодъ быдмис, шыляліс,
кутіс кывны ас пытшсьыс пыр унджык и ун-
джык вын. Некод сійӧс эз кут и гуляйтӧмысь.
Кор окота лоліс, сійӧ тӧвзьыліс парма ягъясӧ
да бурпӧт ризъявліс кузь тӧв бӧрын ловзьыны
заводитӧм вӧрӧд. А рытьявылыс воліс бӧр мус-
мӧм гортас.

Тэрыб Кок вӧлі мелі сьӧлӧма и регыдӧн ве-
лаліс йӧз дінӧ. Но медся ёна кутіс радейтны
сійӧс мездысь Кык Кока Мамлысь внуксӧ –
Ваняӧс, кодӧс ас кыв вылас нимтіс Дженъыд
Кокӧн. Зонкалы вӧлі ар вит-ӧ-квайт, сійӧ частӧ
гӧститӧдліс Тэрыб Кокӧс еджыд изйӧн, коді вӧлі
юмовсьыс-юмов. Таысь чӧскыдджыксӧ йӧрапи
эз на тӧдлы. Тэрыб Коклы лои окота вӧчны
мыйкӧ зэв бурӧс Ванялы. Окота лои ислӧдлышт-
ны сійӧс ас вылас. Но мӧдыс вӧлі ичӧт на и,
дерт, эз на вермы чеччыштны сы вылӧ. Ӧтчыд
Тэрыб Кок лэдзчысис Ваня водзӧ пидзӧс вылас,
и Дженъыд Кок, шудаа сералігтыр, кавшасис

сы вылө. Аслыс Тэрыб Коклы вөлі, гашкө, зонкаысь на нимкодь. Сійö дыр ислөдліс ичөт другсö. Небыд воськолөн и рөдтышталөмөн, зілис, мед эськө не уськөдны сійös. Вочасөн татшөм исласьöмыс кутіс лолыны быд лун.

Кадыс долыда котөртис водзö. Тэрыб Кок вөлі шуда. Быдтор сылы тырмис. Сöмын со сюръясыс эз на петны.

Өтчид, пармаөд котралігөн, Тэрыб Кок ылөкодь муніс гортсьыс. И петіс Печоралөн гажа кыр йылө. Тасянь сылы зэв нимкодь вөлі видзөдны мөдлапөлын лөзалысь помтөм вөрö. А нөшта нимкодьджык вөлі видзөдны ваö, көні тыдаліс сылөн быдмөм-вынсялөм тушаыс. Тадзи нимкодьясьөм бөрын Тэрыб Кок котөртліс галькиа көсалань да бузгысьліс-пырліс юлөн синва кодь сөстөм ваö. Ыркыд ваыс босьтліс сылысь став мудзсö, и олөмыс кажитчис нөшта нин мусаөн.

Өти луно тадзи купайтчигөн Тэрыб Коклөн сюсь пельясыс кылісны таргөм шы. «Буракө, Кык Кока воö»,— долыда мөвпыштіс сійö, сы вөсна мый ёна нин кутіс радейтны йөзös. И збыль — чукыль сайысь мыччысис пыжа, сійö шыллыда исковтіс ва паныд. Тэрыб Кокös казялөм бөрын пыжа веськөдчис сылань. Берегө петісны кыкөн да матыстчисны на вылө повтөг видзөдысь йөрапилань. Налөн чургөдөм лапаясын вөлі юмовтор. Тэрыб Кок велалөмөн нюлыштіс сійös ки пыдөсьяс вылысь да меліа ниртчыштіс юрнас йөз дінö.

Та бöрын Тэрыб Кокöс нöшта на некымынысь чöсмöдлісны ю вывті исковтысь пыжаяс. И сійö, кампет радейтысь кага моз, дзикöдз велаліс тайö гажайнас.

«А Ыджыд Сюра Бать да Мелі Мам эз и видлыны татшöм чöскыдторъяссö,— мөвпаліс öні сійö. И жальöсь лоины бать-мамыс.— Эськö эз кö найö повны Кык Кокаясысь, гашкö, и öні на ловьяöсь вöліны».

Сылысь татшöм думъяссö торкис моторлөн вөр-васö косялысь горыс. Дерт, бара катö ку-тшöмкö пыжа. Нимкодъмöм сьöлөмөн Тэрыб Кок чепöсйис алькöс кöсалань. Гальки вывті котöртігөн сылөн чорыд гыжъя кокъяс улысь весиг сявкйисны би киньяс.


Дерт жö, пыжа бара веськöдчис сылань. Öд йöз сэтшöма радейтöны сійöс. Век на быдөн меліавліс да чöсмöдліс.

Тайö пöрйö Кык Кока вöлі öтнас. Дерт жö, киас сылөн эм чöскыдтор. Мыйкö шуалö гөгөр-вотöма. И мыйлакö тэрыба видзöдлывлö öтарö-мöдарö. Оз-ö пов сійö Тэрыб Кокысь? Тэрыб Кок меліа букöстыштіс да ньöжйöник мөдöдчис паныд. Босьтіс вомас чургöдөм нянь шөрөм, юрсö лэдзыштöмөн кутіс азыма няклявны.

Друг син водзас сылөн быттö югнитіс. Сэс-ся кымöсас мыйкö зэв чорыда шковгис. Синъяссьыс сявкнитіс би, и пырысь-пыр жö кусі лун югыдыс, быри выныс тэрыб кокъяссьыс. И сійö лябис-усис чорыд гальки вылö. Кусысь вежö-

рыс медбөръяысь думыштіс: «Талун ме эг на и
удит ислөдлыны Дженьыд Кокөс...»

А звермөм чужөма Кык Кока нөшта куимысь
кучкис чер тышкөн усьөм Тэрыб Коклы кымө-
сас, кытчө сідзи и эз удитны быдмыны сюръяс.





Литературно-художественное издание

Для детей младшего школьного возраста

ИВАН ГРИГОРЬЕВИЧ ТОРОПОВ

БЫСТРОНОГИЙ

На коми языке

Художник – А. В. Мошев

Художественный редактор – Ю. Н. Лисовский

Вёрстка – Н. В. Вахнин

Подписано к печати 04.03.2011. Формат 60×84¹/₁₆

Бумага офсетная. Гарнитура «Коми TextBook»

Печать офсетная. Уч.-изд. л. 0,7. Усл.-печ. л. 0,93

Тираж 1200 экз. Заказ № 1271

Отпечатано в ООО «Коми республиканская типография»
с дискет заказчика в полном соответствии с качеством
предоставленных материалов

167000, г. Сыктывкар, ул. В.Савина, 81